

# “INCUNTRI AL DOMAN” AL È L’IMNI DAL FRIÛL

Dopo cualchi mê di lavôr intens, l'imni dal Friûl al è stât presentât al public in maniere uficiâl. La prime esecuzion di Incuintri al doman e je stade fate sabide ai 6 di Otubar intal Domo di Lignan, in ocasion dal concerti de Mitteleuropa Orchestra. Dopo di cheste opere, in maniere significative, e je stade eseguide la Novesime sinfonie di Beethoven, che e conten l'“Imni ae gjonde”, o ben l'Imni de Europe Unide. La esecuzion vocâl e je stade assegnade al Coro del Friuli Venezia Giulia, direzût dal mestri Cristiano dell'Oste.

La esecuzion e je stade l'at conclusif di un concurs promovût dal Istitût Ladin Furlan “Pre Checo Placerean” e dal Messaggero Veneto, in colaborazion cu la ARLeF – Agenzie Regionâl pe Lenghe Furlane. Il toc vincidôr al jere stât anunziât in ocasion de Fieste di Patrie dal Friûl, che si è tignude a Voleson Darzin intal Avrîl stât.

«O vevi tal cjâf cheste melodie za di un pâr di agns – al à contât il composîtôr Valter Sivilotti, autôr des musiche - . Mi pareve significative pal nistri teritori e une vore “intonade” cun chel. Mi soi confrontât cul leterât Renato Stroili Gurisatti che al à condividue la mê prime impression. Cussì, tal moment dal Concors organizât de ARLeF, o ai presentade la composizion che e je plasude ancje ae jurie. Un imni al à la sô metriche e mi pâr di vê lavorât suntun teme nobil, cuntun andament mitteleuropean che al caraterize, di tancj decenis, cheste nestre region”.

Il toc che, pe part testuâl, al è stât scrit di Renato Stroili Gurisatti, al è stât selezionât di une jurie di esperts – cun a cjâf il composîtôr di nivel internazionâl Azio Corghi, e componude dal prof. Marco Maria Tosolini, dal prof. Alessio Screm, de prof.e Chiara Vidoni e dal dot. William Cisilino – che lu à valutât tant che chel plui meritevol fra i dîs presentâts, marcant che “la musiche e il test si integrin a vicende, midiant di une scritture vocâl e strumentâl di grant respîr e di slanç di cjant potent”.

Intai prossims dîs a saran disponibii par ducj i spartîts in dodis declinaçions (orchestre, bande, corâls...), e si podarà scoltâ l'audio de esecuzion sul sît [www.arlef.it](http://www.arlef.it).

Pagjine par cure de ARLeF -  
Agenzie Regionâl pe Lenghe Furlane

## Imni uficiâl dal Friûl Incuintri al doman

In alt o fradis, o int di Aquilee,  
devant da la Storie, di front dal doman.  
Sin flame che e vif pes stradis dal mont  
sin non di une Patrie, sin fis dal Friûl.

Scolte o Friûl, o tiere di libars,  
di lenghis e popui sês cjase di pàs.  
Dai secui i paris nus clamin adun  
a fâsi lidris di un unic destin.

In alt o Friûl, o Patrie mê sante,  
di fuarce e sperance si viest la tô int.  
Un popul sigûr che al cjamine te lûs  
incuintri al doman, incuintri ai siei fis.

MUSICHE **Valter Sivilotti**

PERAULIS **Renato Stroili Gurisatti**

